

求恕齋
叢書

雪橋詩話續集

四

雪橋詩話續集卷第四

遼陽楊鍾義撰集

吳興劉承幹參校

康熙戊子遂寧張文端在河工九年舉東撫趙世顯自代遂被總河之命晚節不終侵蝕帑金縱僕受賄鮑辛浦忽祿齋續稿淮北述事一詩頗爲激切詩云碌碌復碌碌河干鬼夜哭問伊哭何爲飲河未滿腹水中魚鼈盡又復來搜粟算緡橫徵商得意兼隴蜀開府建崇牙脂膏自沾渥百僚試私人那容吏部錄表授無虛歲紛如馬量谷積金家邱山列市輦珠玉變童與妙妓羅綺

炫華屋朝筵喧歌鐘夜宴濫絲竹日下何曾箸山海非
一族水齋連艤舫彩纈照屏幄唐花羅四季芬香散川
陸驕侈縱兒孫奢僭逮奴僕盈滿古所戒禍福有倚伏
請看石季倫珊瑚四尺足不見元相國胡椒八百斛以
此致殺身身死名亦辱近有閩中丞淡泊寡嗜欲苦行
同老僧天眷死彌篤予謚并賜金邱壟扇餘馥更有
高安公正已率僚屬三載朝天階單舸載書櫝以彼相
較量冰炭異涼燠寄聲河上公聖明罔不燭未容錫
元圭無爲蒙顯戮亟須奏安瀾蒼生免流毒閩中丞謂

海康陳清端公瓚

聖祖嘗謂其如苦行老僧以五十六年卒於官追授禮部尙書賜銀三千兩高安公謂朱可亭先生時由浙江巡撫入爲總憲也世顯以六十年十一月罷

聖祖嘗謂文端如趙世顯讀書人晚節若此豈不大喪生平讀書之謂何居官者始而好繼而不好天必不容云云繼之者陳恪勤亦文端所薦

歸元恭後別號之多無過鮑辛浦者有若喫虛翁屢提菴主一旅亭長人海長翁佞佛頭陀夢崦居士心隱山人待翁各系以詩自爲圖畫則有讀書松桂林圖秋山行腳圖望衡聚話圖雙谿詩話圖家世簪紱羣從子弟

習爲豪侈盛飾車輿服御聲色狗馬以相誇尙辛浦獨
樂與單門寒素深沈好古之士游業詩專且勤游石門
山作沈輪翁比之康樂其儻居涿鹿檢次羣書作云一
脫朝衫詠筮塗歸來無復舊田廬縱橫十笏維摩室富
有人間叢脞書曾載江頭赤馬船騾綱捆束又經年芸
香消盡衣魚飽懣悔多生文字緣自笑生如食蓼蟲書
淫傳癖坐途窮州人莫笑衣無副都在長生質庫中小
鬟雖媿康成婢老僕真如賴士奴遣向晴窗理殘帙日
斜猶自冷齋廚癸卯長夏杜門追憶平生游歷隨筆載
記題曰雪泥鴻爪錄凡四卷復有冬日雜憶舊游詩六

十首取國朝前輩諸公詩得論詩絕句四十首可以見趣嚮焉

蒙又上一字遠懷少年苦學龐雪厓在戶部日從之間學雪厓荅遠懷見贈原韻云不厭吾廬遠朝來更過門空增一日長何取老生言鑪火禁殘臘魚羹出晚殮逢迎憐好士意氣一飛翻之子方英妙吾衰有病羸忘年宜結友薄德詎堪師且用當前好無深向後思贈詩兼漢魏卽此是良規曾顏能入聖游夏得登堂業自由勤廣貧寧與道妨辭家非浪迹取友盡賢行材大成應晚前途安可量懷抱何曾盡家童屢趣行斜風速歸騎暝

色落層城小別猶堪悵流光倍可驚迎春詰朝至轉眼
又新正以諸生中康熙甲午副榜雅頌集僅錄其春日
漫興一詩西林相國贈又上詩志士惜聲名壯士輕衣
馬賤士無不爲擾攘都城下胸中各有營逐逐未能舍
賢愚雖異儔物役竟相若又上清狂人出處任瀟灑憐
予如弟兄日久不暇假豁達吐肺肝濁醪每共把大言
寧不慙同調應已寡嘗延又上課諸子共晨夕者二十
年贈又上句云不解從人覓顏色狂奴舊日稱男兒官
江蘇時寄懷又上云西谿一茅屋風雨蔽狂夫別後吟
詩否新來得酒無逢人嘲鹿鹿對客唱烏烏舊態誰原

汝應須憶古愚其爲人之高邁可想見矣

德清戚麟祥聖來號鉉谷康熙己丑通籍官侍講學士
雍正元年拜

仁皇遺物之賜有瑪瑙水中丞珠筆架鴛鴦荷色鼻烟
鉉而一硯尤所寶藏硯背御製以靜爲用足以永年八
楷字銘嘗以事戍寧古塔及歸而室儲盡遺書蕩然久
之乃得賜硯孫芸生馥林生距鉉谷九年思慕勿諼因
取以顏其齋曰寶硯并繪爲圖秀水蔣春雨系以長句
有云君家學士選中祕聲振鑾坡翔鳳翅嚴徐庾薛何
足論能使至尊頻寵異龍魚河圖火珠林人間不見

窮文字承明朝夕與論思 先帝私人煩重寄李謫仙

應號鑑湖元才子亦傳宮侍一自鼎湖龍上昇哀纏弓
劍藏橋陵 天子親呼舊侍從文房攜具各拜登松花
之硯乃其一銘辭煌煌長服膺想當肘硯值幾暇五雲
華蓋玉几憑秋風瓠子日月煥龍書穗跡雲烟蒸天章
宸翰接時出金門雨露同分承歸田以之爲嘉話夢回
鈴索通觚棧後來學士遭家難火炎不分玉石爛圖書
杯棬盡飄散頭白身爲萬里竄覆巢之下無卵完何況
區區一文玩君也名孫生太晏文采風流擅詞翰念祖
長思手澤存搜尋不惜兼金換卿家惟有故笏爾撫硯

猶當作三歎馥林爲春雨編次遺稟有詩云風義師兼
友情懷弟與兄何曾相爾汝祇自罄平生馥林爲詩從
春雨得宗法或連日夕交相折其交契良非恆泛也

安邱古渠邱地馬漢荀刺史長淑輯同邑諸人詩爲渠
風輯略七卷如王菊逸上舍克篤題自適齋云詩文方
外史花鳥醉中身王國儒上舍翰臣憶源思云夜臺無
雁到孤塚有狐行馬源思進士澄西村梨花云雲邊回
燕子雪裏見人家曹幼旬上舍北山云穀苗沒犢深中
有人語細曹又魯上舍師彬郊行卽目云霜清雁背留
寒影風織谿冰作斷紋徐太拙振芳秋廬云月黑燐光

生古戍晝陰鬼語出秋墳將軍繫馬居人去燕子尋巢
地主非周保思泰生元宵卽事云酌酒人兼分肉會落
梅歌帶採茶聲曹燦垣上舍煜野望云小谿深淺白蘋
水茅屋高低黃葉村張卯君學博在辛濠上齋偶成云
谿壑易陰偃鬼喜江湖欲凍老蛟潛辛直方上舍敬儀
過小菴書所見云柳陰顧犢牸牛臥花徑分泥乳燕飛
馬三如孝廉長春哭源思弟云母老牀頭雙鬢皤侍兒
問病百回過季方不敢言長逝只道文園尙養疴去取
不苟彙集之有別裁者也

雍正間陳世修官遂昌教諭輯邑人之詩爲平昌詩鈔

中如玉錫禹功句云鳥聲高枕得野色捲簾分毛以澳
瞻武句云谿聲隨過客鳥語破新晴項世溥資霑句云
臥聽蛙聲知水旱坐看鐙燄卜陰晴毛桓克生句云石
壇曬稻乘朝日竹筩通泉帶宿雲皆晚唐一派也克生
宿田家云谿西花放夾谿東夜叩柴扉對野翁雞黍席
中桑海語一鉤落月下青楓非無意人世事者殆亦東
甌之遺老乎

樂清梁祉字介繁有池上編其李斯一首云李斯未焚
書黨塾已塵埃爲治師申韓六經安在哉黃犬何足惜
儒術良可哀斯文當廢興所係非人才商山綺里輩采

芝去不來獨有濟南生隱居誦餘灰一代無幾人氣數
實難回秦雖能賤士士亦自爲媒議論到地趙二酉教
授君宋送崔五竺之茗谿云君訪烟波舊釣徒冷齋尊
酒夜頻呼十年新出三都賦半笈長攜五岳圖春雨乍
看苔劒合秋陰行送箬帆孤匡廬應得王宏祖回首茗
谿雁有無仙居張明焜字木生重游憩雲亭云攜壺重
赴碧山堂好客從來數鄭莊看竹再摩今日眼聽歌猶
斷昔年腸沿谿紅葉矜秋色隔隄元猿怨夜霜漫道亂
餘殊慘澹黃花偏引縷衣香天台胡作肅字恭士遣悶
云經時未理出城游長雨闌風水閣頭生也有涯無奈

病悲哉爲氣不勝秋閒憑曲檻看歸鷺倦倚繩牀駭門
牛已是題糕佳節過倩誰高處共登樓太平戚鳴鳳字
啟周戚鶴泉之祖方正學先生祠云逐燕翻教啄禁門焚蛇
不信有冤魂八忠先後光鄉里十族親疏報國恩到底
周公謀不利可將晁錯事輕論秋風淅瀝祠前樹葉葉
清霜變血痕皆浙東詩之佳者

景翩翩者隸建昌樂籍能詩有妾非吳中人好學吳儂
語之句邑富家兒強委禽焉未數月憤鬱死墓在谿東
江月亭側趙文昇有弔翩墓詩文昇官建寧學博有句
云孤燭客來閒說鬼一官廡下類司香

潛江劉阮山閣學肇國句云西風吹箬笠挾雨上歸舟
朱悔人載震句云渡口桃花艇谿頭竹葉旗桃源闕潛
菴知事士登句云時訂腰領賤文厄羽林尊天門闕雙
石允命句云秋鐙出戶窺牆隙野水如人荅岸聲黃岡
萬考叔引年淇縣晚行云僕立鐙前猶帶夢馬諳行色
慣求鞍孝感程風樵正巽句云貧來菰米全充釜病裏
醫書半在牀黃岡林果存之華平湖野望云烏鵲顧巢
棲樹早牛羊戀草下山遲右皆見廖元度所輯楚風補
零珪斷璧多可誦者

雍正間先後闢青海地千餘里改西寧衛爲府設青海

辦事大臣番族歸附置大通衛秀水徐櫛山丙午紀事
二首云朔方禹版畫雍州天設秦關扼上游統萬城含
沙月白赫連臺壓海風秋七襄織錦輸江右萬騎黃金
出帝邱痛哭敢陳三表策儒生須識大官憂石隙乾坤
帝制雄蟠江丹嶂截飛虹貔貅豈料從天下螻蟻焉能
鬥穴中五郡牙璋新禹貢千盤巖壑舊蠶叢於今海寓
車書合青幕非邀一戰功此詠岳襄勤征土番時事
岳襄勤感懷詩云北海未通中使節南冠不插上公貂
此得罪削爵被逮時作也公以康熙季年從征西藏由
副將遷四川提督雍正二年平青海授三等公賜黃帶

是役以五千兵於十五日內降台吉三禽台吉十有五
三年總督川陝五年準噶爾叛拜西路寧遠大將軍九
年召入覲問機宜交印於提督紀成斌十年二月賊伺
公行入刼馬廠初紀命副參領查廩領卒萬人驅牧駝
馬查廩蒐縮畏邊地寒因以五十人付偏裨放牧而已
率眾避山谷間日置酒高會爲樂馬駝被虜廩聞報先
棄軍去過總兵曹勦壘曹卞急率兵往救爲所敗總兵
樊廷追之轉戰七晝夜始卻紀收廩將斬之公至知廩
宗戚多解其縛委罪於曹斬以徇而以捷聞乃廩恨次
骨會查郎阿巡邊故廩戚也廩因控公矯敗爲功諸狀